

# TELENISA

STATISTIK & DAPATAN 2018



## Diterbitkan oleh

### SIS Forum (Malaysia) - Sisters in Islam

No. 4, Lorong 11/8E, 46200 Petaling Jaya,  
Selangor Darul Ehsan, Malaysia

T +603 7960 3357 / 5121 / 6733

E sis@sistersinislam.org.my

W www.sistersinislam.org

## Pasukan Produksi

### Barisan Penulis

Shareena Sheriff and Nik Shazarina Bakti

### Penyemak

Rozana Isa

### Pereka

Teddie Goh

### Terjemahan

Johan Radzi



Sisters In Islam



@SistersInIslam



sistersinislam.my



SistersinIslamMYS



# ISI KANDUNGAN

## Kata Pengantar Pengarah Eksekutif i

<b>Klien Kami</b>	
Demografi Klien	1
Lokasi & Pendapatan Isi Rumah	2
Profesjon	3
Tempoh Perkahwinan	4
<b>Hak-Hak Wanita</b>	
Asbab-Asbab Keruntuhan Rumahtangga	5
Nafkah Kekal Sebagai Isu Terbesar	6
Jenis-Jenis Perceraian	7
Ruju'	8
<b>Isu Keluarga</b>	
Poligami	9
Undang-undang Tidak Adil Tentang Poligami	10
<b>Hak-Hak Anak</b>	
Nafkah Anak	12
Hak Jagaan Anak (Hadhanah)	13
Perkembangan Kritikal	14
<b>Pembahagian Harta</b>	
Faraid	15
<b>Pendidikan &amp; Pemberdayaan</b>	
Bantuan Guaman	16
Aduan- aduan Klien	17
<b>SENARAI NGO</b>	18

# Assalammualaikum,

Dengan besar hati saya kongsikan dapatan Telenisa bagi tahun 2018. Dalam usaha kami untuk memartabatkan dan memajukan hak-hak wanita muslim di Malaysia, khidmat Telenisa oleh Sisters in Islam akan terus menyediakan khidmat nasihat percuma kepada para wanita mahupun lelaki dalam hal ehwal yang bersangkut-paut dengan hak mereka seperti yang termaktub dalam Undang-undang Keluarga Islam dan Undang-undang Jenayah Syariah di Malaysia.

Seperti yang diamati dalam statistik kami, kadar perceraian amat tinggi, hampir 3,000 perceraian yang direkodkan di antara 2013-2017 di Putrajaya, Labuan, dan Kuala Lumpur sahaja seperti yang telah disebutkan oleh Timbalan Menteri Pembangunan Wanita, Keluarga, dan Masyarakat. Buat tahun ketiga, fasakh mencatatkan angka tertinggi melalui pertanyaan yang diterima. Lazimnya fasakh dimohon oleh para isteri dalam situasi apabila para suami mereka enggan menceraikan mereka. Lingkungan lain yang mencatatkan pertanyaan tertinggi adalah poligami dan lazimnya perkahwinan poligami tersebut dilakukan tanpa pengetahuan isteri mereka, selain daripada isu isteri dan anak-anak yang menghadapi kesulitan hidup dari segi kewangan rentetan daripada perkahwinan poligami tersebut.

Jelas dalam kes-kes kami bahawa peranan wanita dalam perkahwinan semakin berubah. Dahulu, apabila menginjak ke dalam alam perkahwinan wanita bergantung penuh ke atas suami- suami mereka untuk meraih nafkah dan perlindungan, dan sebagai balasan, mereka dikehendaki untuk patuh kepada suami mereka setiap masa. Pun begitu, ramai wanita sudah tidak lagi terkongkong dengan tradisi dan berubah menjadi penyumbang bermakna, kalaupun tidak, penyumbang setara bagi kebaikan keluarga. Atas berkat pendidikan, para wanita semakin mendapat kedudukan cemerlang di alam pekerjaan. Untuk mengharapkan wanita-wanita ini tertambat dengan adat yang sudah tidak selari dengan realiti hari ini akan mengakibatkan keretakan dalam kehidupan harian. Situasi ini semakin tidak adil dan zalim apabila para suami culas menjalankan tanggungjawab mereka terhadap keluarga, bahkan bertambah parah, apabila terjebak dengan keganasan rumah tangga.

Konsep sakinah, mawaddah wa rahmah (damai, kasih dan sayang) seharusnya menjadi pedoman buat setiap mempelai yang diijabkabulkan. Apabila wujudnya kompromi, tolak ansur, dan saling hormat-menghormati, dan apabila si isteri dilayan sebagai pasangan yang setara berbanding sebagai orang suruhan semata, erti mutlak rahmat pekahwinan akan dapat dikecap oleh mempelai.

Saya ingin menzahirkan sekalung budi kepada rakan-rakan yang terlibat dalam menjayakan Telenisa, termasuk pasukan kami yang bekerja untuk kebaikan para klien dan kepada sahabat-sahabat kami, Pusat Bantuan Guaman Kuala Lumpur dan Pusat Bantuan Guaman Selangor, serta para Pelajar Dalam Kamar di bawah seliaan mereka. Doa serta harapan kami mengiringi perjalanan mereka dalam menjadi pejuang hak-hak wanita di Malaysia.

Adalah tinggi harapan saya agar dapatan di dalam buku ini akan menghasilkan kesedaran yang lebih jitu buat isu-isu yang melibatkan para wanita Muslim di Malaysia, serta mampu meraih dukungan bagi advokasi kami untuk kerja-kerja reformasi dalam bidang perundangan, dasar dan amalan yang akan mencipta keadilan dan kesetaraan untuk kaum wanita.

**ROZANA ISA**

*Executive Director, Sisters in Islam*




# Demografi Klien


Pada 2018, Telenisa mempunyai sebanyak 576 klien dengan 411 klien baru. 512 orang klien (89%) merupakan wanita manakala 63 orang klien (11%) pula adalah lelaki.



**Klien Baru dan Berulang (2015 – 2018)**



## Kaedah Berkommunikasi (2015 – 2018)



Pada 2017, Telenisa telah menerima ramai klien melalui kumpulan Facebook yang fokus pada isu wanita dan rumahtangga, tetapi akses Telenisa untuk membuat sebarang komen dalam kumpulan ini telah disekat pada 2018 atas sebab-sebab yang tidak diketahui. Kami sarankan kumpulan-kumpulan Facebook yang membawa tema isu wanita dan rumahtangga untuk memaklumkan kepada para pengikut mereka tentang kewujudan khidmat kami demi menyediakan sokongan dan bantuan hal ehwal perundangan daripada sekadar berkongsi masalah.

Klien kami menghubungi Telenisa melalui emel, panggilan telefon, media sosial dan temujanji bersempuka.

Pada 2018, 288 klien menelefon talian Telenisa, 169 klien telah menghantar emel kepada Telenisa, 33 klien melalui temujanji untuk khidmat nasihat bersempuka dan 96 klien membuat pertanyaan melalui Facebook.

Salah satu rintangan Telenisa ialah untuk mengimbangkan keperluan untuk mempunyai statistik relevan dan sah dengan menjaga privasi klien. Sesetengah statistik diklasifikasikan sebagai tidak diketahui kerana klien enggan mendedahkan maklumat.

## KLIEN KAMI

# Lokasi & Pendapatan Isi Rumah

Kebanyakan klien Telenisa bertumpu di Lembah Klang dengan 321 klien di Kuala Lumpur, Selangor dan Putrajaya, susut daripada 403 klien pada 2017.


Pada 2018, terdapat 45 klien dari Sabah dan Sarawak, satu peningkatan daripada 32 klien pada 2017. 58 klien pula bermastautin di Pantai Timur seperti Kelantan, Terengganu dan Pahang berbanding 40 klien pada 2017. 68 klien dari Johor, Negeri Sembilan dan Melaka berbanding 65 pada 2017 dan 71 klien dari Perak, Kedah, Penang dan Perlis berbanding 83 klien pada 2017.

Kami yakin untuk meluaskan khidmat ke seluruh Malaysia. Namun, memandangkan sumber kami terbatas, bantuan kami kepada klien hanya boleh dibuat melalui telefon, emel atau Facebook buat masa terdekat ini.


16 klien warga Malaysia bermastautin di Australia, India, Pakistan, Dubai dan UK sementara 18 klien bukan warga tempatan berasal dari Indonesia, Filipina, Jerman dan Syria.

40% klien mempunyai pendapatan isi rumah di antara RM1,000 -RM5,000, sementara 32% klien berpendapatan di bawah RM1,000. Untuk makluman, 13% klien memperolehi pendapatan isi rumah sebanyak RM5,000 dan keatas.

**Lokasi Klien**



**Pendapatan Isi Rumah**




# Profesion

Para klien kami mempunyai aneka pekerjaan. Kategori tertinggi adalah 69 klien profesional (11.9%), diikuti oleh 55 klien mahasiswa (9.5%) dan 50 klien kakitangan sokongan (8.7%).

Majoriti klien Telenisa bekerja dan hanya 13.6% yang menganggur atau masih menuntut. 53.2% pula dicatat sebagai tidak diketahui demi menjaga privasi klien.

**Profesjon Klien**



75% klien sedang bekerja di sektor swasta, 21% pula sebagai penjawat awam dan baki 4% dicatat sebagai tidak diketahui.

Tahap pendidikan atau pendapatan klien kami tidak bermaksud mereka lebih celik dengan hak-hak mereka dalam hal ehwal perkahwinan dan keluarga di dalam undang-undang. Atas sebab ini, Telenisa menganjurkan program-program kesedaran untuk mendidik para Muslim di Malaysia akan hak serta tanggungjawab mereka seperti yang termaktub dalam Undang-undang Keluarga Islam Malaysia.


Ini juga memperlihatkan bahawa isu rumah tangga berlaku di setiap genap lapisan masyarakat dan oleh itu, ia satu isu sosial yang mempunyai akibat yang berat kepada seluruh masyarakat.

Selain itu, SIS juga menyarankan agar kursus pra-perkahwinan yang wajib dihadiri oleh warganegara beragama Islam disemak semula supaya mereka mendapat lebih banyak maklumat berkaitan perkahwinan, keluarga dan harta pusaka. Ini juga dapat membimbing dan menjadikan mereka lebih peka terhadap isu-isu seperti nafkah, penjagaan anak, serta keganasan yang berlaku dalam perkahwinan selain harta sepencarian dan hal yang lain.

# Tempoh Perkahwinan

Telenisa juga merekodkan tempoh perkahwinan para klien. Klien di awal perkahwinan (kurang dari setahun) meliputi 28%. Di spektrum berlawanan, 19% telah berkahwin selama satu dasawarsa atau lebih.

Lazimnya para klien memutuskan untuk bercerai pada tahun pertama perkahwinan, sebelum melahirkan zuriat atau berdekad-dekad setelah anak mereka telah dewasa. Klien juga sering tekankan bahawa kebijakan anak adalah keutamaan mereka.




# Asbab-Asbab Keruntuhan Rumahtangga

Pada 2018, asbab utama penceraian adalah masalah komunikasi (17.6%). Kekurangan komunikasi atau ketidakupayaan untuk berkomunikasi antara suami isteri telah mengakibatkan perpecahan keluarga.

Klien berkongsi asbab utama bahawa komunikasi sebagai isu adalah kerana mereka tidak mencapai kesepakatan dalam hal-hal serius seperti yang melibatkan anak kepada hal remeh seperti hiasan dalaman rumah.

Asbab keruntuhan rumahtangga seterusnya adalah keganasan rumahtangga pada 16.3%. Para wanita semakin cakna akan peranan mereka sebagai pasangan setara dalam perkahwinan. Perilaku-perilaku yang memalukan dan berbahaya ditolak oleh para isteri sebagai perilaku yang tidak patut wujud dalam sesebuah perkahwinan.

Konsep saling hormat-menghormati dan kesetaraan pasangan harus berkembang dalam institusi keluarga Muslim dan diterapkan pada generasi anak muda.



Islam melarang para suami menzalimi isteri-isteri mereka sebagaimana dinyatakan di dalam **Al-Quran [4:19 dan 30:21]**. Asbab-asbab lain keruntuhan rumah tangga adalah kecurangan, melarikan diri dan tidak menyediakan nafkah selain ketagihan bahan narkotik adalah tindakan-tindakan kejam kepada ahli keluarga.

# Nafkah Kekal Sebagai Isu Terbesar

Isu kewangan kekal menjadi masalah utama buat para isteri. 75 (32.5%) kes pada 2018 melibatkan soal nafkah isteri. 14.3% kes berkenaan mut'ah dan 12.1% kes tentang nafkah iddah.

Ramai suami tidak menyediakan nafkah kerana mereka menganggap ia tidak perlu memandangkan isteri mereka bekerja dan mendapat gaji.

Perlu diingatkan di dalam **Al Quran [2:233]** Allah SWT dengan jelas telah berfirman "... kewajipan bapa pula ialah memberi makan dan pakaian kepada ibu itu menurut cara yang sepatutnya...".

Undang- undang Keluarga Islam juga menyatakan bahawa ia adalah tanggungjawab si suami atau keluarganya, jika si suami tidak mampu atau menghilangkan diri, untuk menyediakan nafkah buat anak dan isteri.

Tidaklah sukar buat seorang isteri untuk mendapatkan perintah mahkamah agar para suami menjelaskan nafkah. Bagaimanapun, dalam banyak kes kami para suami ingkar perintah tersebut. Mantan isteri harus kembali ke mahkamah untuk membuktikan perintah tersebut tidak dipatuhi dan memohon penguatkuasaan. Justeru, proses melaksanakan perintah jadi perlahan dan leceh. Bagi para ibu tunggal, ia menjadi beban kewangan bagi mereka. Tiada hukuman segera seperti bayaran denda atau pemenjaraan jika gagal mematuhi perintah tersebut. Kebanyakan klien Telenisa, daripada membelanjakan wang dan masa untuk menguatkuasakan perintah nafkah, para isteri biasanya terus berputus asa untuk menuntut hak-hak mereka.

## Isu- Isu Melibatkan Isteri



Wujudnya Bahagian Sokongan Keluarga (BSK) untuk menyalurkan bantuan sara hidup sementara kepada isteri dan anak-anak yang menghadapi masalah mendapatkan nafkah selain menjadi agen mengutip dari pihak yang diperintahkan membayar nafkah. Namun, ramai yang tidak tahu tentang kewujudan BSK.

Menteri Pembangunan Wanita, Keluarga dan Masyarakat, YB Datuk Seri Dr. Wan Azizah telah mengumumkan Insentif Suri – sebuah skim yang menyediakan nafkah kepada para isteri yang dicarum daripada akaun Kumpulan Wang Simpanan Pekerja (KWSP) suami. Yang Berhormat Datuk Seri Dr. Wan Azizah menyedari bahawa suri rumah sering dilepas pandang, walaupun hakikatnya, mereka merupakan tiang seri utama bagi setiap keluarga. Bagaimanapun, ini hanya terlaksana kepada isteri-isteri yang suami mereka bekerja di sektor formal. Para isteri yang mempunyai suami yang bekerja di sektor tidak formal terus menjadi rentan dan tak terlindung.

## Isu- Isu Nafkah Isteri



Sisters in Islam menyambut usaha Kerajaan dengan tangan terbuka demi keadilan buat para isteri dan untuk mereka mendapat hak selayaknya. Walau bagaimanapun, kami juga menyokong bahawa sekatan undang-undang yang cepat dan berkesan juga harus diambil terhadap suami yang melanggar perintah Mahkamah.

# Jenis-Jenis Perceraian


Terdapat enam kaedah perceraian seperti yang digariskan di bawah **Undang-undang Keluarga Islam (Wilayah Persekutuan) Akta 1984**. Mereka adalah: talaq dengan persetujuan bersama, talaq di luar mahkamah, ta'liq, fasakh, li'an dan khul'.

Fasakh merupakan jumlah pertanyaan tertinggi bagi tahun ketiga dengan 35.2%. Fasakh adalah kaedah yang dimulakan oleh si isteri, biasanya apabila si suami enggan melafazkan cerai.

Jenis cerai kedua terbanyak yang dialami klien kami ialah talaq di luar mahkamah (25.8%). Ini terjadi apabila si suami melafazkan talaq (cerai) kepada isterinya di luar mahkamah, biasanya susulan daripada pertengkarannya dan tanpa kehadiran saksi. Isu berkaitan kaedah ini adalah mereka biasanya akan rujuk semula sesudah beberapa jam atau hari. Pasangan akan meneruskan kehidupan seperti biasa, lupa bahawa si suami pernah melafaz talaq. Secara realitinya, pasangan tersebut harus mengesahkan lafaz talaq tersebut di Mahkamah Syariah secepat mungkin.

Sesetengah klien Telenisa hanya menyedari kesan talaq seperti ini setelah berdekad. Mereka biasanya akan khuatiri status nikah mereka dan status kesahtarafan anak-anak (jika hamil selepas talaq dilafazkan).

Dalam sesetengah kes, si isteri tidak tahu pun bahawa suaminya telah melafaz talaq, dan hanya tahu selepas mendapat sijil perceraian. Dalam kes-kes lain, kami



saksikan si suami menggunakan talaq sebagai ugutan untuk si isteri menarik kembali tuntutan nafkahnya dan harta sepencarian.

Talaq di luar mahkamah adalah amalan berbahaya dan digunakan si suami untuk menakut-nakutkan si isteri ketika bertengkar. Di Malaysia, talaq di luar mahkamah telah dipermudahkan secara berperingkat-peringkat, dengan Mahkamah menerima mesej teks talaq (dengan bayaran denda yang kecil), sekaligus dengan talaq tanpa saksi.

Sehubungan dengan ini, kami telah saksikan banyak kes, apabila hak ini disalahpakai oleh pihak suami. Atas sebab ini, di banyak negara Islam, undang-undang telah semakin progresif untuk melindungi kaum wanita.

Di Turki dan Tunisia, lafaz sepihak oleh si suami melalui *talaq* adalah tidak sah sementara di Indonesia, Algeria dan Mauritania, perceraian melalui *talaq* hanya boleh dibuat di mahkamah.

# Rujuk


Terdapat 1,073 kes melibatkan pelbagai isu rumah tangga pada 2018.

Rujuk adalah isu yang paling utama diutarakan dengan 31.2% (335) kes. Rujuk juga dikenali sebagai perdamaian di antara suami dan isteri dalam tempoh iddah .

Tempoh iddah adalah tempoh apabila si isteri harus menghormati kematian suaminya atau setelah bercerai, yang mana beliau tidak diizinkan untuk menikahi lelaki lain. Tempoh iddah berbeza mengikut situasi, dengan tempoh minimum tiga kali suci jika wanita tersebut masih dalam usia melahirkan anak dan jika bukan lagi dalam usia tersebut, tempoh iddah hanyalah tiga bulan. Jika beliau hamil, tempoh iddah berakhir dengan kelahiran si anak.

Rujuk hanya boleh dibuat jika mereka melalui cerai yang membolehkan suami isteri untuk kembali semula (talaq raj'ie). Jika pasangan bercerai melalui talaq yang tidak boleh dirujuk (talaq ba'in), mereka tidak boleh rujuk melainkan diselangi oleh pernikahan si isteri dengan lelaki yang lain.

## Isu-Isu Rumahtangga



Klien sentiasa bertanya tatacara rujuk dan sama ada suami mereka boleh rujuk tanpa keizinan mereka.

**Seksyen 51 Undang-undang Keluarga Islam (Wilayah Persekutuan) 1984** berurusan dengan isu rujuk. Dengan jelas ia menyatakan bahawa izin si isteri adalah prasyarat jika suami mahu rujuk.

Dalam satu kes, si suami pulang untuk hidup sebumbung dengan klien kami, Puan D, 4 minggu selepas bercerai. Si suami menzahirkan niatnya untuk merujuk dengan Puan D. Puan D menghubungi Telenisa kesokan harinya bertanya sama ada itu sah sebagai rujuk. Tambahan lagi, melakukan hubungan intim dalam tempoh iddah tidak semestinya bermaksud rujuk; anak-anak yang lahir selepas cerai akan dianggap anak tak sah taraf.


Untuk memastikan rujuk adalah sah, pasangan harus pergi ke Jabatan Agama dan melafazkan rujuk di hadapan Pendaftar. Kemudian beliau akan mengeluarkan Surat Rujuk buat pasangan; mereka tidak perlu hadir ke mahkamah untuk urusan ini.

# Poligami


Pada 2018, terdapat 176 kes poligami, satu peningkatan dari 106 kes pada 2017 dan 75 kes pada 2016.

Klien biasanya mengadu bahawa perkahwinan poligami oleh para suami adalah di luar pengetahuan mereka. Para suami ini melaksanakan akad nikah di pusat perkahwinan di sempadan Thailand, dengan ini melanggar Undang-undang Malaysia dan juga keperluan untuk memaklumkan si isteri. Dalam sesetengah kes yang kami dapat, si isteri akan dapat tahu tentang perkahwinan poligami tersebut hanya setelah beberapa tahun kemudian.

**Pecahan Kes-Kes Poligami**



**Pecahan Klien- Klien Poligami**



Isu lain adalah berkenaan nafkah. Para suami dalam perkahwinan poligami sering gagal untuk menyediakan nafkah. Pada 2018, 9.7% mengadu bahawa suami mereka tidak lagi menyediakan nafkah dan 10.8% mengadu bahawa anak mereka tidak lagi menerima nafkah daripada si bapa.

11.4% kes adalah perkahwinan poligami yang tidak didaftarkan di Malaysia. Para isteri dalam perkahwinan sedemikian akan kehilangan hak mereka ke atas harta pusaka dan harta sepencarian, dan anak mereka berkemungkinan dianggap sebagai anak tak sah taraf memandangkan perkahwinan ibubapa mereka tidak didaftarkan di Malaysia.

# Undang-Undang Tidak Adil Tentang Poligami

Undang- undang berkait poligami di Malaysia pada tahun 1984 mempunyai syarat-syarat yang ketat. Taraf kehidupan isteri semasa haruslah dikekalkan waima selepas perkahwinan poligami, dan perkahwinan poligami tersebut haruslah dibuktikan adil **DAN** perlu. Walaubagaimanapun, pindaan-pindaan yang dibuat berikutnya pada tahun 1994 dan tahun 2006 telah menghapus hak kaum isteri.

Kini perkahwinan poligami dapat dilakukan secara bersembunyi. Pindaan pada tahun 1994 telah membenarkan perkahwinan yang dilaksanakan tanpa izin Mahkamah untuk didaftarkan dengan hanya membayar denda yang minima. Malahan, poligami semakin banyak dilakukan di sempadan Thailand untuk meloloskan diri daripada meminta keizinan Mahkamah Syariah.

Prasyarat untuk mengekalkan taraf hidup isteri semasa telah dibuang – kegagalan untuk berbuat demikian tidak lagi dihukum oleh undang-undang. Pada tahun 2006, prasyarat perkahwinan telah dilonggarkan kepada hanya adil **ATAU** perlu. Maka, seorang lelaki yang berisiko

melakukan zina dihitung sebagai syarat perlu untuk membenarkan perkahwinan poligami. Bagaimana pula dengan hak isteri?

Di bawah undang- undang terkini, si suami yang bernikah poligami mempunyai hak untuk menuntut harta sepencarian, maka si suami yang akan menikahi isteri baharu akan dapat menjual rumah perkahwinan dan menuntut harta sepencarian untuk membiayai keluarga baharunya.

Di bawah undang- undang terkini, si isteri terpaksa untuk memilih untuk menuntut sama ada nafkah atau harta sepencarian setelah si suami bernikah poligami, yang akhirnya terus mengekang hak kewangan dan keselamatan ekonomi si isteri di dalam perkahwinan tersebut.

Sisters in Islam dengan kerjasama Universiti Kebangsaan Malaysia, Universiti Sains Malaysia dan Universiti Malaya telah melakukan satu penyelidikan nasional berjudul "*Kesan Poligami terhadap Keluarga Muslim di Semenanjung Malaysia*" dari tahun 2007-2012, dengan menemubual 1,224 individu; termasuk suami, isteri pertama, isteri kedua, anak isteri pertama dan anak isteri kedua.

# Undang-Undang Tidak Adil Tentang Poligami

Dapatan adalah seperti berikut:

- **65%** isteri pertama tidak sedar perkahwinan poligami si suami.
- **40%** suami memotong wang nafkah kepada anak, isteri dan perbelanjaan isi rumah.
- **44%** isteri pertama terpaksa berkerja lebih lama untuk mendapat gaji lebih untuk menampung keluarga.
- **64%** isteri pertama mengadu suami mereka tidak mematuhi perjanjian giliran.
- **45%** suami tidak melampirkan permohonan di mahkamah.
- **60%** isteri pertama tidak dinasihati oleh mahkamah.
- **87%** anak mengadu terkesan secara emosi/ psikologi.
- **60%** anak terlibat dengan aktiviti negatif seperti penyalahgunaan dadah, memonteng sekolah dan pengambilan alkohol.

Banyak negara Muslim sedar akan keburukkan perkahwinan poligami kepada institusi keluarga dan menggubal undang-undang untuk melarang atau menyelia amalan berpoligami.

Negara	Undang-undang Ke Atas Poligami
Kyrgyzstan, Tajikistan, Tunisia, Turki, Uzbekistan	Dilarang.
Algeria, Indonesia, Iraq (wilayah Kurdistan)	Memerlukan izin mahkamah dan hanya boleh dibuat dengan persetujuan isteri pertama. Bersyarat ketat dan harus dipatuhi untuk mendapat izin mahkamah.
Bangladesh, Pakistan, Iraq, Jordan, Maghribi, Singapura, Syria	Perlu mendapatkan izin rasmi untuk berpoligami (mahkamah, dll.).
Afghanistan, Algeria, Bahrain, Mesir, Jordan, Lubnan, Mauritania, Maghribi, Palestin	Isteri mempunyai hak untuk bercerai jika mendapat tahu suami berpoligami – sama ada melalui ta'liq atau permohonan ke mahkamah.

Sumber : Musawah

## HAK KANAK

# Nafkah Anak


Nafkah kekal menjadi isu utama melibatkan anak.

**Seksyen 72 Undang- undang Keluarga Islam (Wilayah Persekutuan) 1984** jelas menyatakan bahawa para bapa bertanggungjawab untuk menafkahi anaknya tanpa mengira bahawa dia mempunyai hak jagaan anak atau sebaliknya.


Perintah nafkah anak efektif sehingga anak mencapai umur 18 tahun atau sehingga selesai ijazah pertama. Perintah nafkah tersebut boleh dilanjutkan jika anak tersebut berkelainan upaya, dan jika anak perempuan yang masih belum bernikah atau jika Mahkamah dalam pertimbangannya merasakan layak untuk perlanjutan tempoh.

Para bapa boleh dihukum oleh Mahkamah jika gagal patuhi perintah nafkah anak. Pada 2018, terdapat 267 kes melibatkan nafkah anak dan tunggakan nafkah anak sebanyak 52% sementara hak penjagaan sebanyak 26.2%.

## Isu- Isu Melibatkan Anak



## Isu- Isu Nafkah Anak



Isu terbesar buat nafkah adalah bapa tidak menyediakan nafkah (37.2%), bapa tidak menyediakan nafkah dengan cukup (20.9%) selain bapa menganggur dan bapa yang menghilangkan diri kedua-duanya pada 10.2%.

Isu ini sebenarnya adalah isu yang lapuk di Malaysia. Sisters In Islam telah memperjuangkan agar hukuman yang lebih berat dijatuhkan ke atas para bapa yang enggan membayar nafkah anak. Di sesetengah negara, pihak kerajaan yang menyandang tanggungjawab untuk memastikan si bapa membayar nafkah kerana ia mengambil kira kebijakan anak-anak sebagai suatu isu nasional yang mustahak. Ini perlu kerana tanpa hukuman berat, para bapa akan terus mengabaikan keperluan nafkah anak. Akibatnya, si anak terkesan dengan kekurangan penjagaan kesihatan dan pendidikan. Jika kaum ibu harus membebani tanggungjawab kewangan dan bekerja lebih masa, si anak tidak akan mendapat asuhan ibubapa yang diperlukan di rumah.

Kami menyambut baik pengumuman Menteri dalam Jabatan Perdana Menteri yang ditugaskan dengan hal ehwal agama, Yang Berhormat Datuk Seri Dr. Mujahid Yusof Rawa bahawa kerajaan akan melaksanakan sistem baharu yang mana Mahkamah Syariah akan menuntut sumbangan mantan suami kepada Kumpulan Wang Simpanan Pekerja (KWSP) dan akaun bank untuk membayar nafkah isteri dan anak sekiranya suami gagal. Kami berharap kerajaan akan terus menggubal dasar dan polisi untuk memastikan kebijakan anak dalam rumah tangga yang retak terus kekal diutamakan.

# Hak Jagaan Anak (*Hadhanah*)


Hak jagaan anak adalah subjek utama apabila ibubapa bertelingkah.

**Seksyen 81 Undang-undang Keluarga Islam (Wilayah Persekutuan) 1984 (UUKI)** menyatakan bahawa ibu adalah yang paling layak untuk menyandang hak menjaga anak, disusuli oleh nenek sebelah ibu, sebelum si bapa dan kemudian nenek sebelah bapa.

Tempoh jagaan adalah 7 tahun buat anak lelaki dan 9 tahun buat anak perempuan. Walaubagaimanapun, tempoh ini boleh dilanjutkan sehingga 9 tahun (untuk anak lelaki) dan 11 tahun (untuk anak perempuan). Apabila tamat tempoh hak jagaan, hak jagaan itu secara automatik akan jatuh pada si bapa. Namun, setelah anak mencapai umur kepandaian (mumayyiz), si anak bebas untuk memilih siapa mendapat hak jagaan, asalkan kebijakan anak terjaga.

Pada 2018, Telenisa mencatatkan 71 kes (26.2%) melibatkan hak jagaan anak. Isu yang kerap timbul dikalangan klien kami ialah pertikaian hak jagaan (56.3%). Pertikaian hak jagaan menerbitkan sisi buruk sesetengah ibubapa sehingga ada yang tergamak menculik anak sendiri daripada si penjaga, Telenisa mencatat 8 kes culik anak pada 2018.

**Isu- Isu Hak Jagaan Anak**



Isu seterusnya adalah lawatan berselia dengan 22 kes (31%). Klien kami mengadu bahawa bekas pasangan mereka enggan patuhi lawatan berselia kerana mereka menganggap anak tersebut adalah zuriat mereka, maka mereka tidak seharusnya diselia.

Selain itu, hak jagaan anak tak sah taraf dipertanggungjawabkan ke atas ibu kandung dan keluarga beliau sepenuhnya sebagaimana diperuntukkan di bawah **Seksyen 85 UUKI**. Si bapa tiada apa hak pun terhadap anak tersebut meskipun beliau ingin bertanggungjawab.

# Perkembangan Kritikal

Sepanjang 2018, beberapa kes telah meletus di Malaysia.

### Anak Tak Sah Taraf

Lebih dikenali sebagai kes ‘bin Abdullah’, ia masih tergantung dan menanti keputusan Mahkamah Persekutuan.

Isunya adalah sesetengah bapa yang mahu bertanggungjawab ke atas kehamilan pra-nikah. Mereka bernikah dan terus melahirkan anak. Pun begitu, anak sulung dilabel sebagai anak tak sah taraf. Si anak menderita akibat stigma yang meghantui dirinya dengan nama ‘bin Abdullah’.

Dalam kes ini, si bapa mahu anak perempuannya berbintikan namanya di dalam sijil kelahiran dan kad pengenalan. Malangnya tidak diizinkan oleh Jabatan Pendaftaran Negara.

### Perkahwinan Kanak- Kanak

Pada Jun 2018, kes seorang lelaki berumur 40 tahun menikahi gadis 11 tahun di Kelantan mencetuskan kemarahan Malaysia.

Perkahwinan bawah umur berbahaya kepada kesihatan anak perempuan, terutama apabila mereka hamil di usia muda. Ia juga menafikan hak anak perempuan ke atas pendidikan memandangkan mereka telah berkahwin atau terpaksa berhenti sekolah setelah mengandung.

Sisters in Islam terlibat dalam kempen #WhenIWas11 yang dianjurkan oleh The Body Shop bersama dengan the Association of Women Lawyers (AWL) dan Women’s Aid Organisation (WAO).

SIS juga melibatkan diri dalam Kempen “Pelajar bukan Pengantin”.

### Penukaran Agama SePihak

Mahkamah Persekutuan sebulat suara mengeluarkan keputusan yang mengejutkan dalam kes Indira Gandhi. Mahkamah memutuskan bahawa penukaran agama anak yang dibuat sepihak kepada Islam adalah tidak sah tanpa keizinan kedua ibu dan bapa. Mahkamah membuat keputusan tersebut atas paksi kemaslahatan si anak, dan dalam isu-isu yang berat seperti agama, izin ibu dan bapa adalah diperlukan.

Setelah 9 tahun, Indira faham dan terima bahawa anak perempuannya adalah seorang Muslim. Pun begitu, beliau tidak seharusnya dinafikan hak untuk bertemu dengan anaknya. Meskipun setelah keputusan dikeluarkan, sehingga hari ini, Indira masih belum bertemu anaknya.

Sehingga Februari 2019, masih tiada perkembangan tentang keberadaan anaknya

# Faraid

Terdapat 68 kes melibatkan harta.

Faraid adalah pembahagian estet simati di antara waris-waris. Di Telenisa, kami terima banyak pertanyaan tentang faraid iaitu sebanyak 31.6%. Pertanyaan biasanya bersangkut paut dengan pertikaian keluarga, kegelisahan dan perceraian.

Telenisa ingin menyarankan bahawa selain faraid sebagai kaedah pembahagian harta, setiap Muslim patut cakna dengan cara-cara lain berurusan dengan harta pusaka. Antara kaedah lain yang wujud adalah melalui wasiat, hibah (hadiah), wassiyah (amanah) dan waqaf (derma).

Dalam kebanyakan kes kami, simati ingin mewasiatkan beberapa harta (cth: simpanan KWSP, sawah padi atau kereta) kepada insan-insan terpilih, biasanya si isteri atau anak. Mereka berbuat begitu untuk memastikan keluarga tidak kesusahan setelah kematian mereka. Pun begitu, dalam banyak kes, beberapa benefisiari lain seperti abang dan saudara lelaki mencabar wasiat tersebut dan menuntut saham mereka. Kemudian ia diluluskan di oleh mahkamah seperti hukum faraid. Aset tunai, KWSP dan polisi insurans juga tertakluk kepada faraid, meskipun benefisiari telah dinamakan. Si isteri yang dinamakan sebagai benefisiari sumbangan KWSP suami hanya dihitung sebagai wasi dan saudara lelaki lain boleh membuat tuntutan mereka mengikut peraturan faraid.

Bagaimanapun, adalah penting untuk dinyatakan bahawa para isteri juga punya hak untuk tuntut harta sepencarian dari estet sebelum pembahagian melalui faraid. Hak ini tidak diketahui oleh banyak pihak.

Para benefisiari ini menuntut untuk "hak mereka" seperti mana yang digariskan oleh agama. Sementara itu, Telenisa juga telah menyaksikan ramai isteri dan anak kehilangan rumah mereka dan hidup merempat akibat hal ini. Sistem ini tidak adil dan tidak mengambil kira realiti semasa dimana saudara lelaki tidak lagi menjalankan tanggungjawab atas keluarga simati (seperti amalan umat pada zaman Rasulullah SAW). Si balu terpaksa memikul tanggungjawab kewangan ke atas anak-anaknya setelah kematian suami. Anak perempuan juga bertanggungjawab secara kewangan ke atas ibu mereka setelah kematian si bapa. Inilah realiti masa kini.

## Pembahagian Harta



Sisters in Islam menyeru semakan semula ke atas peraturan faraid. Di hari-hari awal kedatangan Islam, kaum wanita tidak berpendidikan, tidak bekerja dan oleh itu tidak mempunyai harta. Maka, adalah tanggungjawab saudara lelaki untuk menyara kehidupan mereka. Wanita moden hari ini telah dimerdekaan oleh pendidikan dan berpeluang untuk bekerja dan memiliki harta. Mereka juga harus menyara diri sendiri apabila suami atau ibubapa meninggal dunia. Maka, tidak ada alasan lagi buat saudara lelaki mewarisi melebihi saudara perempuan mereka. Undang-undang pewarisan harta harus disemak agar mencerminkan realiti seperti yang dihadapi hari ini.

# Bantuan Guaman

Pusat-Pusat Bantuan Guaman Kuala Lumpur dan Selangor telah bekerjasama dengan SIS sejak 2003. Sepanjang 2018, seramai 26 orang Pelatih Dalam Kamar telah bertugas di Telenisa, ia adalah sebahagian daripada latihan mereka dalam kamar. Para Pelatih dilengkapkan dengan pengetahuan syariah dan ilmu mereka terus diperkasakan di bawah seliaan Telenisa. Mereka juga digalakkan untuk hadiri ke sesi-sesi Mahkamah Syariah untuk membuat pemerhatian, tatalaku, proses dan juga keputusan-keputusan yang disampaikan sebagai sebahagian tugas mereka di Telenisa.

## Pengamatan ke atas Hakim Syarie

- Kebanyakan hakim jelas apabila mereka menasihati Plaintiff dan Defendan yang tidak diwakili peguam.
- Sesetengah hakim membantu dan mengawalselia pihak yang tidak diwakili peguam tapi sesetengah Hakim yang lain tidak dan menyebabkan pihak-pihak kebuntuan.
- Seorang hakim mengugut untuk menghukum Plaintiff apabila beliau bertanya banyak kerana tidak celik prosedur.
- Hakim mengamati tatacara dengan sikap yang tenang dan waspada.

## Pengamatan ke atas Peguam Syarie

- Beberapa peguam hadir lewat dan membuat anakguam mereka tertunggu-tunggu.
- Seorang peguam tidak punya dokumen yang diperlukan ketika perbicaraan. Dia juga bergesa pulang setelah pendengaran selesai.
- Seorang peguam amat angkuh dengan anakguamnya. Pelatih terdengarkan cara si peguam berkomunikasi dengan bersuara kuat dan keras di luar Mahkamah.

## Pengamatan ke atas Prosedur & Sistem Mahkamah

- Kekurangan disiplin di kalangan kakitangan Mahkamah.
- Kes dan jadual di papan notis tidak dikemaskini.
- Mencadangkan agar kes-kes seperti khawat dan wali hakim dijalankan dalam kamar kerana ia isu sensitif.
- Jurubahasa menyarankan Tertuduh untuk mengaku bersalah dan membayar denda untuk tidak membuang masa.
- Mikrofon tidak dipakai, mereka yang hadir di galeri tidak dapat mendengar apa yang diucapkan.



# Aduan Dari Klien

## Aduan terhadap Peguam

- Peguam gagal memberi nasihat terbaik untuk kepentingan anakguam.
- Anakguam telah membayar yuran guaman tetapi peguam ponteng pendengaran.
- Peguam hadir lewat.

## Aduan terhadap Jabatan Agama

- Pegawai Jabatan Agama gagal untuk menasihati klien secara berhemah; kurang berpengetahuan ke atas tatacara mahkamah syariah dan hak klien sebagai seorang isteri dan bekas isteri.
- Klien memohon bantuan daripada Baitulmal untuk mendapatkan peguam syarie memandangkan klien didera oleh suami, tetapi permohonan ditolak. Kemudian beliau mendapat tahu bahawa si suami telah disediakan dengan bantuan oleh Baitulmal untuk memfailkan kes terhadap klien untuk Kembali Taat Kepada Suami.

## Aduan terhadap Hakim Syarie

- Klien mengadu Hakim berbuat keputusan tanpa kehadiran beliau. Si suami memfailkan untuk hak jagaan anak tapi tidak dimaklumkan untuk pendengaran.
- Hakim tidak mempertimbangkan keterangan yang disediakan oleh klien meskipun klien berhujah bahawa bukti-bukti yang dikemukakan pihak sebelah adalah lemah.

## Aduan terhadap Sistem Mahkamah

- Pegawai Sulh enggan patuhi tatacara kerana meminta klien bersetuju perjanjian dengan yang telah dibuat oleh pihak si suami tanpa berbincang terlebih dahulu; Pegawai Sulh mengatakan bahawa perbincangan tidak diizinkan.
- Mahkamah memberi penghakiman tanpa pengetahuan klien memandangkan isteri memfailkan fasakh; klien tidak tahu perbicaraan telah diadakan.

## Apa Yang Anda Boleh Lakukan Untuk Membantu

SUMBANGAN BOLEH DISALURKAN MELALUI: SIS Forum (Malaysia) | 5641 8240 5457 (Maybank)

### Organisasi-Organisasi Yang Membantu & Mendukung Wanita

#### Talian NUR

15999

Keganasan  
rumah tangga,  
penderaan anak

#### All Women's Action Society (AWAM)

03 - 7877 4221

Kaunseling,  
keganasan seksual  
& rogol

#### Women's Aid Organisation (WAO)

03 - 7965 3488

Kaunseling dan  
rumah perlindungan  
untuk wanita

#### Perak Women for Women (PWW)

05 - 546 9715

Kaunseling

#### Legal Aid Centre (Selangor)

03 - 5510 7007

Perwakilan  
guaman percuma

#### Legal Aid Centre (Kuala Lumpur)

03 - 2693 1440

Perwakilan  
guaman percuma

#### Women Centre for Change (WCC) Penang

04 - 228 0342

Kaunseling & nasihat  
guaman percuma

#### Women Centre for Change (WCC) Seberang Prai

04 - 298 8340

Kaunseling & nasihat  
guaman percuma

#### Sabah Women's Action Resource Group (SAWO)

088 - 269 291

Kaunseling & nasihat  
guaman percuma

#### Sarawak Women for Women Society (SWWS)

082 - 422 660

Kaunseling & nasihat  
guaman percuma



SIS FORUM - MALAYSIA (266561W)

#### SIS Forum (Malaysia)

No. 4, Lorong 11/8E, Petaling Jaya  
46200 Selangor, Malaysia

T (603) 7960 3357 / 5121 / 6733

F (603) 7960 8737

E [sis@sistersinislam.org.my](mailto:sis@sistersinislam.org.my)

W [sistersinislam.org](http://sistersinislam.org)

#### Telenisa

No. 4, Lorong 11/8E, Petaling Jaya  
46200 Selangor, Malaysia

T (603) 7960 8802

E [telenisa@sistersinislam.org.my](mailto:telenisa@sistersinislam.org.my)

Beroperasi setiap Selasa, Rabu & Khamis

Dari 10.00 am - 5.00 pm



officialSIS



Sistersinislam



sistersinislam.my



telenisa.sis